

四庫全書

史部

欽定四庫全書

南史卷四十九

唐

李

延

壽

撰

列傳第三十九

庾杲之

叔父華

王湛

從叔掄

何憲

孔暹

孔珪

劉懷珍

子靈括
劉沼

從父弟峻
從子懷慰

懷慰子霽

沓

歊

懷珍從孫司

懷珍族弟善明

庾杲之字景行新野人也祖深之位義興太守以善政

聞父粲為宋南郡王義宣丞相城局參軍王舉兵見殺
杲之幼有孝行宋司空劉劭見而竒之謂曰見卿足使
江漢崇望杞梓發聲解褐奉朝請稍遷尚書駕部郎清
貧自業食唯有韭菹瀹韭生韭雜菜任昉嘗戲之曰誰
謂庾郎貧食鮭嘗有二十七種累遷尚書左丞王儉謂
人曰昔袁公作衛軍欲用我為長史雖不獲就要是意
向如此今亦應須如我輩人也乃用杲之為衛將軍長
史安陸侯蕭綯與儉書曰盛府元僚寔難其選庾景行

汎淥水依芙蓉何其麗也時人以入儉府為蓮花池故
緬書美之歷位黃門吏部郎御史中丞參大選美容質
善言笑嘗兼侍中夾侍柳世隆在御坐謂齊武帝曰庾
杲之為蟬冕所映彌有華采陛下故當與其即真上甚
悅王儉仍曰國家以杲之清美所以許其假職若以其
即真當在胡諧之後武帝嘗與朝臣商畧酒後謂羣臣
曰我後當得何謚羣臣莫有荅者王儉因目杲之從容
曰陛下壽等南山方與日月齊明千載之後豈是臣子

輕所仰量時人雅歎其辯荅杲之嘗兼主客郎對魏使
使問杲之曰百姓那得家家題門帖賣宅荅曰朝廷既
欲掃蕩京洛剋復神州所以家家賣宅耳魏使縮鼻而
不荅時諸王年少不得妄稱接人敕杲之及濟陽江淹
五日一詣諸王使申遊好再遷尚書吏部郎參大選事
太子右衛率加通直常侍九年卒上甚惜之謚曰貞子
萼字休野杲之叔父也仕齊為驃騎功曹史博涉羣書
有口辯永明中與魏和親以萼兼散騎常侍報使還拜

散騎侍郎知東宮管記事後為荊州別駕前後紀綱皆致富饒萼再為之清身率下杜絕請託布被蔬食妻子不免飢寒齊明帝聞而嘉焉手敕褒美州里榮之初梁州人益州刺史鄧元起功勲甚著名地卑瑣願名挂士流時始興忠武王憺為州將元起位已高而解巾不先州官則不為鄉里所悉元起乞上籍出身州從事憺命萼用之萼不從憺大怒召萼責之曰元起已經我府卿何為苟惜從事萼曰府是尊府州是萼州宜須品藻憺

不能折遂止累遷會稽郡丞行郡府事時承彫弊之後
百姓凶荒米斗至數千人多流散萆撫循甚有理唯守
公祿清節愈厲至有經日不舉火太守永陽王聞而饋
之萆謝不受天監元年卒停屍無以斂柩不能歸梁武
帝聞之詔賜絹百疋穀五百斛初萆為西楚望族兄子
杲之又有寵於齊武帝萆早歷顯官鄉人樂藹有幹用
素與萆不平互相陵競藹事齊豫章王嶷嶷薨藹仕不
得志自步兵校尉求助戍歸荊州時萆為州別駕益忽

藹及梁武帝踐阼藹以西朝勲為御史中丞華始得會稽行事既恥之矣會職事微有譴帝以藹其鄉人也使宣旨誨之華大憤故發病卒子喬復仕為荊州別駕時元帝為荊州刺史而州人范興話以寒賤仕叨九流選為州主簿又皇太子令及之故元帝勒喬聽興話到職及屬元日府州朝賀喬不肯就列曰庾喬忝為端右不能與小人范興話為鴈行元帝聞乃進喬而停興話興話羞慙還家憤卒世以喬為不墜家風喬子質少聰慧

家富於財好賓客食必列鼎又狀貌豐美頤頰開張人皆謂笈必為方伯無餒乏之慮及魏剋江陵卒致餓死時又有水軍都督褚羅面甚尖危有從理入口竟保衣食而終

王諶字仲和東海郟人晉少傅雅玄孫也祖慶員外常侍父元閔護軍司馬宋大明中沈曇慶為徐州辟諶為迎主簿又為州迎從事湘東王彧國常侍鎮北行參軍及彧即帝位是為明帝除司徒參軍帶薛令兼中書舍

人謚有學義見親遇常在左右帝所行慘僻謚屢諫不從請退坐此繫尚方後拜中書侍郎明帝好圍碁置圍碁州邑以建安王休仁為圍碁州都大中正謚與太子右率沈勃尚書水部郎庾珪之彭城丞王抗四人為小中正朝請褚思莊傳楚之為清定訪問後為尚書左丞領東觀祭酒即明帝所置總明觀也遷黃門郎齊永明初累遷豫章王太尉司馬武帝與謚相遇於宋明之世甚委任之歷黃門郎領驍騎將軍太子中庶子謚貞正

和謹朝廷稱為善人多與之厚八年轉冠軍將軍長沙王車騎長史徙廬江王中軍長史又徙西陽王子明征虜長史行南兗府州事謹少貧常自紡績及通貴後每為人說之世稱其達九年卒

謹從叔摛以博學見知尚書令王儉嘗集才學之士總校虛實類物隸之謂之隸事自此始也儉嘗使賓客隸事多者賞之事皆窮唯廬江何憲為勝乃賞以五花簾白團扇坐簾執扇容氣甚自得摛後至儉以所隸示之

曰卿能奪之乎。搗操筆便成文章。既奧辭亦華美。舉坐
擊賞。搗乃命左右抽憲簾。手自掣取扇。登車而去。儉笑
曰。所謂大力者。負之而趨。竟陵王子良校試諸學士。唯
搗問無不對。為秣陵令。清直請謁不行。羽林隊主潘敞
有寵。二宮勢傾人主。婦弟犯法。敞為之請。搗搗投書於
地。更鞭四十。敞怒。譖之。明日而見代。永明八年。天忽黃
色。照地。衆莫能解。司徒法曹王融上金天頌。搗曰。是非
金天。所謂榮光武帝大悅。用為永陽郡。後卒於尚書左

承

何憲字子思廬江潛人博涉該通羣籍畢覽天閣寶祕
人間散逸無遺漏焉任昉劉渢共執祕閣四部書試問
其所知自甲至丁書說一事并敘述作之體連日累夜
莫見所遺宗人何遁退讓士也見而美之願與為友憲
位本州別駕國子博士永明十年使于魏時又有孔暘
字世遠會稽山陰人也好典故學與王儉至交昇明中
為齊臺尚書儀曹郎屢箴闕禮多見信納上謂王儉曰

過真所謂儀曹不忝厥職也儉為宰相過常謀議幄帳
每及選用頗失鄉曲情儉從容啟上曰臣有孔過猶陛
下之有臣永明中為太子家令卒時人呼孔過何憲為
王儉三公及卒儉惜之為撰祭文

孔珪字德璋會稽山陰人也祖道隆位侍中父靈產泰
始中晉安太守有隱遁之志於禹井山立館事道精篤
吉日於靜屋四向朝拜涕泣滂沲東出過錢唐北郭輒
於舟中遙拜杜子恭墓自此至都東向坐不敢背側元

徽中為中散大夫頗解星文好術數齊高帝輔政沈攸之起兵靈產白高帝曰攸之兵衆雖強以天時冥數而觀無能為也高帝驗其言擢遷光祿大夫以簾盛靈產上靈臺令其占候餉靈產白羽扇素隱几曰君有古人之風故贈君古人之服當世榮之珪少學涉有美譽太守王僧虔見而重之引為主簿舉秀才再遷殿中郎高帝為驃騎取為記室參軍與江淹對掌辭筆為尚書左丞父憂去官與兄仲智還居父山舍仲智妾李氏驕妬

無禮珪白太守王敬則殺之永明中厯位黃門郎太子中庶子廷尉江左承用晉時張杜律二十卷武帝留心法令數訊囚徒詔獄官詳正舊注先是尚書刪定郎王植撰定律奏之削其煩害錄其允衷取張斐注七百三十一條杜預注七百九十一條或二家兩釋於義乃備者又取一百七條其注相同者取一百三條集為一書凡一千五百三十二條為二十卷請付外詳校擿其違謬詔從之於是公卿八座參議考正舊注有輕重處竟

陵王子良下意多使從輕其中朝議不能斷者則制旨
平決至九年珪表上律文二十卷錄序一卷又立律學
助教依五經例詔報從之事竟不行轉御史中丞建武
初為平西長史南郡太守珪以魏連歲南伐百姓死傷
乃上表陳通和之策帝不從徵侍中不行留本任珪風
韻清疎好文詠飲酒七八斗與外兄張融情趣相得又
與琅邪王思遠廬江何點點弟僧竝款交不樂世務居
宅盛營山水憑几獨酌傍無雜事門庭之內草萊不翦

中有蛙鳴或問之曰欲為陳蕃乎珪笑答曰我以此常
兩部鼓吹何必効蕃王晏嘗鳴鼓吹候之聞羣蛙鳴曰
此殊聒人耳珪曰我聽鼓吹殆不及此晏甚有慙色永
元元年為都官尚書遷太子詹事加散騎常侍三年珪
疾東昏屏除以床舁之走因此疾甚遂卒贈金紫光祿
大夫

劉懷珍字道玉平原人漢膠東康王寄之後也其先劉
植為平原太守因家焉祖昶從慕容德南度河因家于

北海都昌宋武帝平齊以為青州中從事位至員外常侍伯父奉伯宋世位至陳南頓二郡太守懷珍幼隨奉伯至壽陽豫州刺史趙伯符出獵百姓聚觀懷珍獨避不視奉伯異之曰此兒方興吾家本州辟主簿元嘉二十八年亡命司馬順則聚黨東陽州遣懷珍將數千人討平之宋文帝問破賊事懷珍讓功不肯當親人怪問焉懷珍曰昔國子居恥陳河間之級吾豈能論邦域之捷哉時人稱之江夏王義恭出鎮盱眙道遇懷珍以應

對見重取為驃騎長史兼墨曹行參軍孝建初為義恭
大司馬參軍直閣將軍隨府轉太宰參軍大明二年以
軍功拜樂陵河間二郡太守賜爵廣晉縣侯司空竟陵
王誕反郡人王弼門族甚盛勸懷珍起兵助誕懷珍殺
之帝嘉其誠除豫章王子尚車騎參軍母憂去職服闋
見江夏王義恭義恭曰別子多年那得不老對曰公恩
未報何敢便老義恭善其對累遷黃門郎領虎賁中郎
將桂陽王休範反加懷珍前將軍守石頭出為豫州刺

史加督建平王景素反懷珍遣子靈掎領兵赴建鄴沈攸之在荆楚遣使人許天保說結懷珍斬之送首於齊高帝封中宿縣侯進平南將軍增督二州初宋孝武世齊高帝為舍人懷珍為直閣相遇早舊懷珍假還青州高帝有白驄馬齧人不可騎送與懷珍別懷珍報上百匹絹或謂懷珍曰蕭公此馬不中騎是以與君耳君報百匹不亦多乎懷珍曰蕭君局量堂堂寧應負人此絹吾方欲以身名託之豈計錢物多少高帝輔政以懷珍

內資未多徵為都官尚書領前將軍以第四子晃代為
豫州刺史或疑懷珍不受代高帝曰我布衣時懷珍便
推懷投款況在今日寧當有異晃發經日疑論不止上
乃遣軍主房靈人領百騎進送晃謂靈人曰論者謂懷
珍必有異同我期之有素必不應爾卿是其鄉里故遣
卿行非唯衛新亦以迎故懷珍還乃授相國右司馬及
齊臺建朝士人人爭為臣吏以懷珍為宋臺右衛懷珍
謂帝曰人皆迎新臣獨送故豈以臣篤於本乎齊建元

元年轉左衛將軍加給事中改封霄城侯懷珍年老以
禁旅辛勤求為閑職轉光祿大夫卒遺言薄葬贈雍州
刺史謚敬侯

子靈哲字文明位齊郡太守前軍將軍靈哲所生母嘗
病靈哲躬自祈禱夢見黃衣老公與藥曰可取此食之
疾立可愈靈哲驚覺於枕間得之如言而疾愈藥似竹
根於齋前種葉似莧苳嫡母崔氏及兄子景煥泰始中
為魏所獲靈哲為布衣不聽樂及懷珍卒當襲爵靈哲

固辭以兄子在魏存亡未測無容越當茅土朝廷義之
靈哲傾產贖嫡母及景煥累年不能得武帝哀之令北
使者請之魏人送以還南襲懷珍封爵靈哲位兗州刺
史隆昌元年卒

峻字孝標本名法武懷珍從父弟也父璇之仕宋為始
興內史峻生期月而璇之卒其母許氏攜峻及其兄法
鳳還鄉里宋泰始初魏剋青州峻時年八歲為人所略
為奴至中山中山富人劉寶愍峻以束帛贖之教以書

學魏人聞其江南有戚屬更徙之代都居貧不自立與
母竝出家為尼僧既而還俗峻好學寄人廡下自課讀
書常燎麻炬從夕達旦時或昏睡熱其鬚髮及覺復讀
其精力如此時魏孝文選盡物望江南人士才學之徒
咸見申擢峻兄弟不蒙選拔齊永明中俱奔江南更改
名峻字孝標自以少時未開悟晚更厲精明慧過人苦
所見不博聞有異書必往祈借清河崔慰祖謂之書淫
於是博極羣書文藻秀出故其自序云螢中濟濟皆升

堂亦有愚者解衣裳言其少年魯鈍也時竟陵王子良招學士峻因人求為子良國職吏部尚書徐孝嗣抑而不許用為南海王侍郎不就至齊明帝時蕭遙欣為豫州引為府刑獄禮遇甚厚遙欣尋卒久不調梁天監初召入西省與學士賀蹤典校祕閣峻兄孝慶時為青州刺史峻請假省之坐私載禁物為有司所奏免官安成王秀雅重峻及安成王遷荊州引為戶曹參軍給其書籍使撰類苑未及成復以疾去因遊東陽紫巖山築室

居焉為山栖志其文甚美初梁武帝招文學之士有高才者多被引進擢以不次峻率性而動不能隨衆沉浮武帝每集文士策經史事時范雲沈約之徒皆引短推長帝乃悅加其賞賚魯策錦被事咸言已罄帝試呼問峻峻時貧悴冗散忽請紙筆疏十餘事坐客皆驚帝不覺失色自是惡之不復引見及峻類苑成凡一百二十卷帝即命諸學士撰華林徧略以高之竟不見用乃著辯命論以寄其懷論成中山劉沼致書以難之凡再反

峻竝為申析以荅之會沼卒不見峻後報者峻乃為書以序其事其文論竝多不載峻又嘗為自序其略云余自比馮敬通而有同之者三異之者四何則敬通雄才冠世志剛金石余雖不及之而節亮慷慨此一同也敬通逢中興明君而終不試用余逢命世英主亦擯斥當年此二同也敬通有忌妻至於身操井臼余有悍室亦令家道輾轉此三同也敬通當更始世手握兵符躍馬肉食余自少迄長戚戚無懼此一異也敬通有子仲文

官成名立余禍同伯道永無血脩此二異也敬通旅力
剛強老而益壯余有犬馬之疾溘死無時此三異也敬
通雖芝殘蕙焚終填溝壑而為名賢所慕其風流郁烈
芬芳久而彌盛余聲塵寂寞世不吾知魂魄一去將同
秋草此四異也所以力自為序遺之好事云峻本將門
兄法鳳自北歸改名孝慶字仲昌早有幹略齊末為兗
州刺史舉兵應梁武封餘千男歷官顯重峻獨篤志好
學居東陽吳會人士多從其學普通三年卒年六十門

人謚曰玄靖先生

劉沼字明信中山魏昌人六世祖興晉驃騎將軍沼幼善屬文及長博學位終秣陵令

懷慰字彥泰懷珍從子也祖奉伯宋元嘉中為冠軍長史父乘人冀州刺史死於義嘉事懷慰持喪不食醯醬冬日不用絮衣養孤弟妹事寡叔母皆有恩義仕宋為尚書駕部郎懷慰宗從善明等為齊高帝心腹懷慰亦預焉齊國建上欲置齊郡於都下議者以江右土沃流

人所歸乃置於瓜步以懷慰為輔國將軍齊郡太守上
謂懷慰曰齊邦是王業所基吾方欲以為顯任經理之
事一以委卿有手敕曰有文事必有武備今賜卿玉環
刀一口懷慰至郡修城郭安集居人墾廢田二百頃決
沈湖灌溉不受禮謁人有餉其新米一斛者懷慰出所
食麥飯示之曰食有餘幸不煩此因著廉吏論以達其
意高帝聞之手敕褒賞進督秦沛二郡妻子在都賜米
三百石兖州刺史柳世隆與懷慰書曰膠東流化潁川

致美以今方古曾何足云懷慰本名聞慰武帝即位以
與舅氏名同敕改之後兼安陸王北中郎司馬卒明帝
即位謂僕射徐孝嗣曰劉懷慰若在朝廷不憂無清吏
也子霽杳歆

霽字士湮九歲能誦左氏傳十四居父憂有至性每哭
輒嘔血家貧與弟杳歆勵志勤學及長博涉多通梁天
監中厯位西昌相尚書主客侍郎海鹽令霽前後宰二
邑竝以和理稱後除建康令不拜母胡氏寢疾霽年已

五十衣不解帶者七旬誦觀世音經數萬遍夜中感夢
見一僧謂曰夫人算盡君精誠篤志當相為申延後六
十日餘乃亡霽廬于墓哀慟過禮常有雙白鶴循翔廬
側處士阮孝緒致書抑譬焉霽思慕不已未終喪而卒
著釋俗語八卷文集十卷

杳字士深年數歲徵士明僧紹見之撫而言曰此兒實
千里之駒十三丁父憂每哭哀感行路梁天監中為宣
惠豫章王行參軍杳博綜羣書沈約任昉以下每有遺

忘皆訪問焉嘗於約坐語及宗廟犧樽約云鄭玄荅張
逸謂為畫鳳皇尾婆娑然今無復此器則不依古杳曰
此言未必可安古者樽彝皆刻木為鳥獸鑿頂及背以
出內酒魏時魯郡地中得齊大夫子尾送女器有犧樽
作犧牛形晉永嘉中賊曹嶷於青州發齊景公冢又得
二樽形亦為牛象二處皆古之遺器知非虛也約大以
為然約又云何承天纂文奇博其書載張仲師及長頸
王事此何所出杳曰仲師長尺二寸唯出論衡長頸是

毗騫王朱建安扶南以南記云古來至今不死約即取
二書尋檢一如杳言約郊居宅時新構閣齋杳為贊二
首并以所撰文章呈約約即命工書人題其贊於壁仍
報杳書共相歎美又在任昉坐有人餉昉楮酒而作楬
字昉問杳此字是不杳曰葛洪字苑作木旁若昉又曰
酒有千日醉當是虛言杳曰桂陽程鄉有千里酒飲之
至家而醉亦其例昉大驚曰吾自當遺忘實不憶此杳
云出楊元鳳所撰置郡事元鳳是魏代人此書仍載其

賦三重五品商溪掾里昉即檢楊記言皆不差王僧孺
被使撰譜訪杳血脉所因杳云桓譚新論云太史三代
世表旁行邪上竝効周譜以此而推當起周代僧孺歎
曰可謂得所未聞周捨又問杳尚書着紫荷橐相傳云
挈囊竟何所出杳曰張安世傳云持橐簪筆事孝武皇
帝數十年韋昭張晏注並曰橐囊也簪筆以待顧問范
岫撰字書音訓又訪杳焉尋佐周捨撰國史出為臨津
令有善績秩滿縣三百餘人詣闕請留敕許焉後詹事

徐勉舉杳及顧協等五人入華林撰徧略書成以晉安王府參軍兼廷尉正以足疾解因著林庭賦王僧孺見而歎曰郊居以後無復此作累遷尚書儀曹郎僕射徐勉以臺閣文議專委杳焉出為餘姚令在縣清絜湘東王繹發教褒美之大通元年為步兵校尉兼東宮通事舍人昭明太子謂曰酒非卿所好而為酒尉之職政為卿不愧古人耳太子有瓠食器因以賜焉曰卿有古人之風故遺卿古人之器俄有敕代裴子野知著作郎事

昭明太子薨新宮建舊人例無停者敕特留香焉僕射
何敬容奏轉香王府諮議武帝曰劉杳須先經中書仍
除中書侍郎尋為平西湘東諮議參軍兼舍人著作如
故遷尚書左丞卒杳清儉無所嗜好自居母憂便長斷
腥羶持齋蔬食臨終遺命斂以法服載以露車還葬舊
墓隨得一地容棺而已不得設靈筵及祭醑其子遵行
之撰要雅五卷楚辭草木疏一卷高士傳二卷東宮新
舊記三十卷古今四部書目五卷文集十五卷並行於

世

欽字士光生夕有香氣氤氲滿室幼有識慧四歲喪父
與羣兒同處獨不戲弄六歲誦論語毛詩意所不解便
能問難十二讀莊子逍遙篇曰此可解耳客問之隨問
而荅皆有情理家人每異之謂為神童及長博學有文
才不娶不仕與族弟訐竝隱居求志遨遊林澤以山水
書籍相娛而已奉母兄以孝悌稱寢食不離左右母意
有所須口未及言欽已先知手自營辦狼狽供奉母每

疾病夢歆進藥及翌日轉有間効其誠感如此性重興
樂尤愛山水登危履嶮必盡幽遐人莫能及皆歎其有
濟勝之具常欲避人世以母老不忍違每隨兄霽杳從
宦少時好施務周人之急人或遺之亦不拒也久而歎
曰受人者必報不則有愧於人吾固無以報人豈可常
有愧乎天監十七年忽著革終論以為形者無知之質
神者有知之性有知不獨存依無知以自立故形之於
神逆旅之館耳及其死也神去此館速朽得理是以子

羽沉川漢伯方壙文楚黃壤士安麻索此四子者得理也若從四子而遊則平生之志得矣然積習生常難卒改革一朝肆志儻不見從今欲剪截煩厚務存儉易進不裸尸退畢常俗不傷存者之念有合至人之道且張奐止用幅巾王肅唯盟手足范冉斂畢便葬爰珍無設筵几文度故舟為棺子廉牛車載柩叔起誠絕墳隴康成使無卜吉此數公者尚或如之況為吾人而尚華泰今欲髣髴景行以為軌則氣絕不須復魂盥漱而斂以

一千錢市成棺單故裘衫衣巾枕履此外送往之具棺
中常物一不得有所施世多信李彭之言可謂惑矣余
以孔釋為師差無此惑歛訖載以露車歸於舊山隨得
一地地足為坎坎足容棺不須塋甃不勞封樹勿設祭
饗勿置几筵其蒸嘗繼嗣言象所絕事止余身無傷世
教初訐之疾歆盡心救療及卒哀傷為之誄又著悲友
賦以序哀情忽有老人無因而至謂曰君心力堅猛必
破死生但運會所至不得久留一方耳彈指而去歆心

知其異試遣尋之莫知其所於是信心彌篤既而寢疾恐貽母憂乃自言笑勉進湯藥謂兄霽杳曰兩兄祿仕足伸供養歆之歸泉復何所憾願深割無益之悲十八年年三十二卒始沙門釋寶誌遇歆於興皇寺驚起曰隱居學道清淨登仙如此三說歆未死之春有人為其庭中栽柿歆謂兄子弇曰吾不見此實爾其勿言至秋而亡人以為知命親故誄其行迹謚曰貞節處士先是以太中大夫琅邪王敬脩以天監八年卒遺命不得設

復魄旌旒一蘆蔭藉下一枚覆上吾氣絕便沐浴籃輿
載尸還忠侯大夫隧中若不行此則戮吾尸於九泉敬
脩外甥許慧詔因阮研以聞詔曰敬脩令其息崇素氣
絕便沐浴藉以二蘆蔭鑿地周身歸葬忠侯此達生之
格言賢夫玉匣石槨遠矣然子於父命亦有所從有所
不從今崇素若信遺意土周淺薄屬辟不施一朝見侵
狐鼠戮屍已甚父可以訓子子亦不可行之外內易棺
此自奉親之情藉土而葬亦通人之意宜兩捨兩取以

達父子之志棺周於身上周於槨去其牲奠斂以時服
一可以申情二可以稱家禮教無違生死無辱此故當
為安也

訐字彥度懷珍從孫也祖承宗宋太宰參軍父靈真齊
鎮西諮議武昌太守訐幼稱純孝數歲父母繼卒訐居
喪哭泣孺慕幾至滅性赴弔者莫不傷焉後為伯父所
養事伯母及昆姊孝友篤至為宗族所稱自傷早孤人
有誤觸其諱者未嘗不感結流涕長兄絜為聘妻尅日

成婚訐聞而逃匿事息乃還本州刺史張稷辟為主簿
主者檄召訐乃挂檄於樹而逃陳留阮孝緒博學隱居
不交當世恒居一鹿牀環植竹木寢處其中時人造之
未嘗見也訐經一造孝緒即顧以神交訐族兄歆又履
高操三人日夕招攜故都下謂之三隱訐善玄言尤精
意釋典曾與歆聽講鍾山諸寺因共卜築宋熙寺東澗
有終焉之志尚書郎何炯嘗遇之於路曰此人風神穎
俊蓋荀奉倩衛叔寶之流也命駕造門拒而不見族祖

孝標與書稱之曰訐超越俗如半天朱霞歆矯矯出塵如雲中白鶴皆儉歲之梁稷寒年之織纈訐嘗著敝皮巾披納衣每遊山澤輒留連忘返神理閑正姿貌甚華在林谷之間意氣彌遠或有遇之者皆謂神人家甚貧苦併日而食隆冬之月或無繒絮訐處之晏然人不覺其飢寒也自少至長無喜愠之色每於可競之地輒以不競勝之或有加陵之者莫不退而愧服由是衆論咸歸重焉天監七年卒於歆舍臨終執歆手曰氣絕便

斂斂畢即埋靈筵一不須立勿設饗祀無求繼嗣歆從
而行之宗人至友相與刊石立銘謚曰玄貞處士

善明懷珍族弟也父懷人仕宋為齊北海二郡太守元
嘉末青州饑荒人相食善明家有積粟躬食餽粥開倉
以救鄉里多獲全濟百姓呼其家田為續命田善明少
而靜處讀書刺史杜驥聞名侯之辭不相見年四十刺
史劉道隆辟為中從事懷人謂善明曰我已知汝立身
復欲見汝立官也善明應辟仍舉秀才宋孝武見其策

強直甚異之泰始初徐州刺史薛安都反青州刺史沈
文秀應之時州居東陽城善明家在郭內不能自拔伯
父彌之詭說文秀求自効文秀使領軍主張靈慶等五
千人援安都彌之出門密謂部曲曰始免禍坑矣行至
下邳乃背文秀善明從伯懷恭為北海太守據郡相應
善明密契收集門宗部曲得三千人夜斬關奔北海族
兄乘人又聚渤海以應朝廷而彌之尋為薛安都所殺
明帝贈青州刺史以乘人為冀州刺史善明為北海太

守除尚書金部郎乘人病卒仍以善明為冀州刺史文
秀既降除善明海陵太守郡境遑海無樹木善明課人
種榆櫝雜果遂獲其利還為直閣將軍五年魏剋青州
善明母在焉移置代郡善明布衣蔬食哀戚如持喪明
帝每見為之歎息轉巴西梓潼二郡太守善明以母在
魏不願西行泣涕固請見許朝廷多哀善明心事元微
初遣北使朝議令善明舉人善明舉州鄉北平田惠紹
使魏贖母還時宋後廢帝新立羣臣執政善明獨事齊

高帝委身歸誠出為西海太守行青冀二州刺史善明從弟僧副與善明俱知名於鄉里泰始初魏攻淮北僧副將部曲二千人東依海島齊高帝在淮陰壯其所為召與相見引為安成王撫軍參軍後廢帝肆暴高帝憂恐常令僧副微行伺察聲論使密告善明及東海太守垣崇祖使動魏兵善明勸靜以待之高帝納焉廢帝見殺善明為高帝驃騎諮議南東海太守行南徐州事沈攸之反高帝深以為憂善明獻計曰沈攸之控引八州

縱情蓄斂苞藏賊志於焉十年性既險躁才非持重起
逆累旬遲回不進豈應有所待也一則闇於兵機二則
人情離怨三則有掣肘之患四則天奪其魄本疑其輕
速掩襲未備今六師齊奮諸侯同舉此已籠之鳥耳事
平高帝召善明還都謂曰卿策沈攸之雖張良陳平適
如此耳仍遷太尉右司馬齊臺建為右衛將軍辭疾不
拜司空褚彥回謂善明曰高尚之事乃卿從來素意今
朝廷方相委待詎得便學松喬邪善明荅曰我本無宦

情既逢知己所以戮力驅馳天地廓清朝廷濟濟鄙吝
既申不敢昧於富貴矣高帝踐阼以善明勲誠欲與之
祿召謂曰淮南近畿國之形勝非親賢不居卿與我臥
理之乃代明帝為淮南宣城二郡太守遣使拜授封新
塗伯善明至都上表陳事凡一十一條其一以為天地
開創宜存問遠方廣宣慈澤其二以為京都遠近所歸
宜遣醫藥問其疾苦年九十以上及六疾不能自存者
隨宜量賜其三以為宋氏赦令蒙原者寡愚謂今下赦

書宜令事實相副其四以為劉昶猶存容能送死境上
諸城宜應嚴備其五以為宜除宋氏大明以來苛政細
制以崇簡易其六以為凡諸土木之費且可權停其七
以為帝子王女宜崇儉約其八以為宜詔百官及府州
郡縣各貢讜言以弘廣唐虞之美其九以為忠貞孝悌
宜擢以殊階清儉苦節應授以政務其十以為革命惟
始宜擇才北使其十一以為交州險要荒之表宋末
政苛遂至怨叛今宜懷以恩德未應遽勞將士搖動邊

毗又撰賢聖雜語奏之託以諷諫上優詔荅之又諫起
宣陽門表陳宜明守宰賞罰立學校制齊禮開賓館以
接鄰國上荅曰夫賞罰以懲守宰飾館以待遐荒皆古
之善政吾所宜勉更撰新禮或非易制國學之美已敕
公卿宣陽門今敕停寡德多闕思復有聞善明身長七
尺九寸質素不好聲色所居茅齋斧木而已牀榻几案
不加剗削少立節行常云在家當孝為吏當清子孫楷
式足矣及累為州郡頗黷財賄崔祖思怪而問之荅曰

管子云夷吾知我因流涕曰方寸亂矣豈暇為廉所得
金錢皆以贖母及母至清節方峻所歷之職廉簡不煩
俸祿散之親友與崔祖思友善祖思出為青冀二州善
明遺書敘舊因相勗以忠槩及聞祖思死慟哭仍得病
建元二年卒豫命薄殯贈左將軍豫州刺史謚烈伯子
滌嗣善明家無遺儲唯有書八千卷高帝聞其清貧賜
滌家葛塘屯穀五百斛曰葛屯亦吾之垣下令後世知
其見異善明從弟僧副字士雲位前將軍封豐陽男卒

於巴西梓潼二郡太守上圖功臣像讚僧副亦在焉兄
法護字士伯有學業位濟陰太守

論曰詩稱抑抑威儀惟人之則又云其儀不忒正是四
國觀夫景之風流所得休野行已之度蓋其有焉仲和
性履所遵德璋業尚所守殆人望也懷珍宗族文質斌
斌自宋至梁時移三代或以隱節取高或以文雅見重
古人云立言立德斯門其有之乎

南史卷四十九

南史卷四十九考證

庾杲之傳父粲為宋南郡王義宣丞相城局參軍○監

本缺宋南二字今增正

孔珪傳王晏嘗鳴鼓吹候之○候監本訛候今改正

劉霽傳字士湮○湮梁書作烜

常有雙白鶴循翔廬側○循梁書作馴

劉杳傳鄭玄答張逸謂為畫鳳皇尾婆娑然○婆娑梁

書作娑娑

杳曰此言未必可安○安一本作按

有人餉昉楫酒而作楫字○楫監本訛楫今改从梁書
卿有古人之風故遺卿古人之器○此與本卷孔珪傳
齊高帝餉珪父靈產白羽扇素隱凡曰君有古人之
風故贈君古人之服二語相同

文集十五卷○一本無此五字

劉歊傳忽有一老人無因而至○梁書歊幼時嘗獨坐
空室有一老公至門與此小異

南史卷四十九考證

欽定四庫全書

史部

南史卷

五十一

詳校官編修_臣裴謙

洗馬_臣王坦修覆勘

覆校官主事_臣李駿

校對官中書_臣施元輅

謄錄監生_臣任揖文

欽定四庫全書

南史卷五十

唐

李

延

壽

撰

列傳第四十

劉瓛

弟瓛

族子顯

明僧紹

子山賓

庾易

子黔婁

於陵

劉虬

子之暉

之昌

劉瓛字子珪沛郡相人晉丹陽尹恢六世孫也祖弘之
給事中父惠臨賀太守瓛篤志好學博通訓義年五歲

聞舅孔熙先讀管寧傳欣然欲讀舅更為說之精意聽受曰此可及也宋大明四年舉秀才兄璩亦有名先應州舉至是別駕東海王元曾與璩父惠書曰此歲賢子充秀州閭可謂得人除奉朝請不就兄弟三人共處蓬室一間為風所倒無以葺之怡然自樂習業不廢聚徒教授常有數十丹陽尹袁粲於後堂夜集聞而請之指聽事前古柳樹謂璩曰人謂此是劉尹時樹每想高風今復見卿清德可謂不衰矣薦為祕書郎不見用後拜

安成王撫軍行參軍公事免璫素無宦情自此不復仕
袁粲誅璫微服往哭并致賻助齊高帝踐阼召璫入華
林園談語問以政道荅曰政在孝經宋氏所以亡陛下
所以得之是也帝咨嗟曰儒者之言可寶萬世又謂璫
曰吾應天革命物議以為何如璫曰陛下戒前軌之失
加之以寬厚雖危可安若循其覆轍雖安必危及出帝
謂司徒褚彥回曰方直乃耳學士故自過人敕璫使數
入而璫自非詔見未嘗到宮門上欲用璫為中書郎使

吏部尚書何戢喻旨戢謂璫曰上意欲以鳳池相處恨君資輕可且就前除少日當轉國子博士便即所授歟笑曰平生無榮進意今聞得中書郎而拜記室豈本心哉後以母老闕養拜彭城郡丞司徒褚彥回宣旨喻之荅曰自省無廊廟才所願唯保彭城丞耳上又以璫兼總明觀祭酒除豫章王驃騎記室參軍丞如故璫終不就武陵王暉為會稽太守上欲令璫為曄講除會稽郡丞學徒從之者轉衆永明初竟陵王子良請為征北司

徒記室璪與張融王思遠書曰奉教使恭召會當停公
事但念生平素抱有乖恩顧吾性拙人間不習仕進昔
嘗為行佐便以不能及公事免黜此眷者所共知也量
已審分不敢期榮夙嬰貧困加以踈懶衣裳容髮有足
駭者中以親老供養褰裳徒步脫爾逮今二代一紀先
朝使其更自修正勉勵於階級之次見其繼縷或復賜
以衣裳袁褚諸公咸加勸勵終於不能自反也一不復
為安可重為哉昔人有以冠一免不重加於首每謂此

得進止之儀又上下年尊益不願居官次廢晨昏也先
朝為此曲申從許故得連年不拜既習此歲久又齒長
疾侵豈宜攝齋河間之聽厠迹東平之僚本無絕俗之
操亦非能偃蹇為高此又聽覽所當深察者也近初奉
教便自希得託迹客游之末而固辭榮級其故何邪以
古之王侯大人或以此延四方之士有追申白而入楚
羨鄒枚而游梁吾非敢叨夫曩賢庶欲從九九之遺迹
既於聞道集泮不殊而幸無職司拘礙可得奉溫清展

私計志在此耳除步兵校尉不拜璫姿狀纖小儒業冠
於當時都下士子貴游莫不下席受業當世推其大儒
以比古之曹鄭性謙率不以高名自居之詣於人惟一
門生持胡牀隨後主人未通便坐門待荅佳在檀橋瓦
屋數間上皆穿漏學徒敬慕不敢指斥呼為清溪焉竟
陵王子良親往修謁七年表武帝為璫立館以楊烈橋
故主第給之生徒皆賀璫曰室美豈為人哉此華宇豈
吾宅邪幸可詔作講堂猶恐見害也未及徙居遇疾子

良遣從臾學者彭城劉繪順陽范縝將尉於璫宅營齋
及卒門人受學者竝弔服臨送璫有至性祖母病疽經
年手持膏藥漬指為爛母孔氏甚嚴明謂親戚曰阿稱
便是今世曾子稱璫小名也年四十餘未有婚對建元
中高帝與司徒褚彥回為璫娶王氏女王氏穿壁挂履
土落孔氏牀上孔氏不悅璫即出其妻及居母憂佳墓
下不出廬足為之屈杖不能起此山常有鵠鵲鳥璫在
山三年不敢來服釋還家此鳥乃至梁武帝少時嘗經

伏膺及天監元年下詔為廡立碑諡曰貞簡先生所著文集行於世初廡講月令畢謂學生嚴植之曰江左以來陰陽律數之學廢矣吾今講此曾不得其彷彿學者美其退讓時濟陽蔡仲熊禮學博聞謂人曰五音本在中土故氣韻調平今既東南土氣偏諛故不能感動木石廡亦以為然仲熊執經議論往往與時宰不合亦終不改操求同故坎壈不進歷年方至尚書左丞當時恨其不遇又東陽婁幼瑜字季玉著禮据拾三十卷

璵弟璵字子璵方軌正直儒雅不及璵而文采過之宋
泰豫中為明帝挽郎齊建元初為武陵王畢冠軍征虜
參軍畢與僚佐飲自割鵝炙璵曰應刀落俎是膳夫之
事殿下親執鸞刀下官未敢安席因起請退與友人會
稽孔暉同舟入東於塘上遇一女子暉目送曰美而艷
璵曰斯豈君子所宜言乎非吾友也於是解裳自隔或
曰與友孔徹同舟入東徹留目觀岸上女子璵舉席自
隔不復同坐兄璵夜隔壁呼璵璵不荅方下牀著衣立

然後應璩怪其久璩曰向東帶未竟其立操如此文惠
太子召璩入侍東宮每上事輒削草尋署射聲校尉卒
於官時濟陽江重欣亦清介雖處閤室如對嚴賓而不
及璩也重欣位至射聲校尉

顯字嗣芳璩族子也父醴字仲翔博識強正名行自居
幼為外祖臧質所鞠養質既富盛恒有音樂質亡後母
沒十許年醴每聞絲竹之聲未嘗不歔歔流涕梁天監
初終於晉安內史顯幼而聰敏六歲能誦吕相絕秦賈

誼過秦琅邪王思遠吳國張融見而稱之號曰神童族伯璵儒學有重名卒無嗣齊武帝詔顯為後時年八歲本名頤齊武帝以字難識改名顯天監初舉秀才解褐中軍臨川王行參軍俄署法曹顯博涉多通任昉嘗得一篇缺簡文字零落示諸人莫能識者顯見云是古文尚書所刪逸篇昉檢周書果如其說昉因大相賞異丁母憂服闋尚書令沈約時領太子少傅引為少傅五官約為丹陽尹命駕造焉於坐策顯經史十事顯對其九

約曰老夫昏忘不可受策雖然聊試數事不可至十顯
問其五約對其二陸倕聞之擊席喜曰劉郎子可謂差
人雖吾家平原詣張壯武王粲謁伯喈必無此對其為
名流推賞如此五兵尚書傳昭掌著作撰國史顯自兼
廷尉正被引為佐及草選尚書五都顯以法曹兼吏部
郎後為尚書儀曹郎嘗為上朝詩沈約見而美之命工
書人題之於郊居宅壁後兼中書通事舍人再遷驃騎
都陽王記室兼中書舍人後為中書郎舍人如故顯與

河東裴子野南陽劉之遴吳郡顧協連職禁中遞相師友人莫不慕之顯博聞強記過於裴顧時波斯獻生師子帝問曰師子有何色顯曰黃師子超不及白師子超魏人送古器有隱起字無識者顯案文讀之無滯考校年月一字不差武帝甚嘉焉遷尚書左丞除國子博士時有沙門訟田帝大署曰貞有司未辯徧問莫知顯曰貞字文為與上人帝因忌其能出之後為雲麾邵陵王長史尋陽太守魏使李諧至聞之恨不相識歎曰梁德

衰矣善人國之紀也而出之無乃不可乎王遷鎮郢州
除平西府諮議參軍久在府不得志大同九年終於夏
口時年六十三凡佐兩府竝事驕王人為之憂而反見
禮重友人劉之遴啟皇太子為之銘誌葬於秣陵縣劉
真長舊塋子莠恁臻臻早有名載北史

顯從弟穀字仲寶形貌短小儒雅博洽善辭翰隨湘東
王在蕃十餘年寵寄甚深當時文檄皆其所為位吏部
尚書國子祭酒魏剋江陵入長安

明僧紹字休烈平原鬲人一字承烈其先吳太伯之裔
百里奚子孟明以名為姓其後也祖玩州中從事父畧
給事中僧紹明經有儒術宋元嘉中再舉秀才永光中
鎮北府辟功曹並不就隱長廣郡嶗山聚徒立學魏剋
淮南乃度江昇明中齊高帝為太傅敎辟僧紹及顧歡
臧榮緒以旌幣之禮徵為記室參軍不至僧紹弟慶符
為青州僧紹乏糧食隨慶符之鬱洲住弇榆山栖雲精
舍欣玩水石竟不一入州城泰始季年岷益有山崩淮

水竭齊郡僧紹竊謂其弟曰夫天地之氣不失其序若夫陽伏而不泄陰迫而不蒸於是乎有山崩川竭之變故伊洛竭而夏亡河竭而殷亡三川竭岐山崩而周亡五山崩而漢亡夫有國必依山川而為固山川作變不亡何待今宋德如四代之季爾誌吾言而勿泄也竟如其言齊建元元年冬徵為正員郎稱疾不就其後帝與崔思祖書令僧紹與慶符俱歸僧紹又曰不食周粟而食周薇古猶發議在今寧得息談邪聊以為笑慶符罷

任僧紹隨歸住江乘攝山僧紹聞沙門釋僧遠夙德往
候定林寺高帝欲出寺見之僧遠問僧紹曰天子若來
居士若為相對僧紹曰山藪之人政當鑿坯以遁若辭
不獲命便當依戴公故事既而遁還攝山建栖霞寺而
居之高帝甚以為恨昔戴顓高卧牖下以山人之服加
其身僧紹故云高帝後謂慶符曰卿兄高尚其事亦堯
之外臣朕夢想幽人固已勤矣所謂逕路絕風雲通仍
賜竹根如意筍箨冠隱者以為榮焉勃海封延伯者高

行士也聞之歎曰明居士身彌後而名彌先亦宋齊之
儒仲也永明中徵國子博士不就卒僧紹長兄僧胤能
言玄仕宋為江夏王義恭參軍王別為立榻比之徐孺
子位冀州刺史子慧照元徽中為齊高帝平南主簿從
拒桂陽累至驃騎中兵參軍與伯玉對領直建元元年
為巴州刺史綏懷蠻蜒上許為益州刺史未遷卒僧胤
次弟僧暲亦好學宋大明中再使魏于時新誅司空劉
誕孝武謂曰若問廣陵之事何以答之對曰周之管蔡

漢之淮南帝大悅及至魏魏問曰卿銜此命當緣上國
無相踰者邪荅曰聰明特達舉袂成帷比屋之眊又無
下僕晏子所謂看國善惡故再辱此庭位至青州刺史
僧紹子元琳仲璋山賓並傳家業山賓最知名

山賓字孝若七歲能言玄理十三博通經傳居喪盡禮
起家奉朝請兄仲璋痼疾家道屢空山賓乃行干祿後
為廣陽令頃之去官會詔使公卿舉士左衛將軍江祐
上書薦山賓才堪理劇齊明帝不重學謂祐曰聞山賓

談書不輟何堪官邪遂不用梁臺建累遷右軍記室參
軍掌吉禮時初置五經博士山賓首應其選歷中書侍
郎國子博士太子率更令中庶子天監十五年出為持
節都督緣淮諸軍事北兗州刺史普通二年徵為太子
右衛率加給事中遷御史中丞以公事左遷黃門侍郎
四年為散騎常侍東宮新置學士又以山賓居之俄以
本官兼國子祭酒初山賓在州所部平陸縣不稔啓出
倉米以賑百姓後刺史檢州曹失簿以山賓為耗損有

司追責籍其宅入官山賓不自理更市地造宅昭明太
子聞築室不就有令曰明祭酒雖出撫大蕃擁旌推轂
珥金拖紫而恒事屢空聞構宇未成今送薄助并詒詩
曰平仲古稱奇夷齊昔擅美令則挺伊賢東秦固多士
築室非道傍置宅歸仁里庾粲方有係原生今易擬必
來三徑人將招五經士山賓性篤實家中嘗乏困貨所
乘牛既售受錢乃謂買主曰此牛經患漏蹄療差已久
恐後脫發無容不相語買主遽追取錢處士阮孝緒聞

之歎曰此言足使還淳反朴激薄停澆矣五年又假節攝北兗州事後卒官贈侍中諡曰質子山賓累居學官甚有訓導之益然性頗踈通接於諸生多狎比人皆愛之所著古禮儀注二百二十四卷禮儀二十卷孝經喪服義十五卷子震字興道亦傳父業位太子舍人尚書祠部郎餘姚令山賓弟少遐字處默亦知名位都官尚書書簡文謂人曰我不喜明得尚書更喜朝廷得人後拜青州刺史太清之亂奔魏仕北齊卒于太子中庶子子

罕司空記室明氏南度雖晚並有名位自宋至梁為刺史者六人

庾易字幼簡新野人也徙居江陵祖玫巴郡太守父道驥安西參軍易志性恬靜不交外物齊臨川王映臨州表薦之餉麥百斛易謂使人曰走蕪採麋鹿之伍終其解之毛衣馳騁日月之車得保自耕之祿於大王之恩亦已深矣辭不受以文義自樂安西長史袁承欽其風贈以鹿角書格蚌盤蚌研白象牙筆并贈詩曰白日清

明青雲遼亮昔聞巢許今覩臺尚易以連理几竹翹書
格報之建武三年詔徵為司空主簿不就卒子黔婁嗣
黔婁字子貞一字貞正少好學多所講誦性至孝不曾
失色於人南陽高士劉虬宗測並歎異之仕齊為編令
政有異績先是縣境多猛獸暴黔婁至猛獸皆度往臨
沮界時以為仁化所感徙孱陵令到縣未旬易在家遘
疾黔婁忽心驚舉身流汗即日棄官歸家家人悉驚其
忽至時易疾始二日醫云欲知差劇但嘗糞甜苦易泄

利黔婁輒取嘗之味轉甜滑心愈憂苦至夕每稽顙北辰求以身代俄聞空中有聲曰徵君壽命盡不復可延汝誠禱既至政得至月末晦而易亡黔婁居喪過禮廬于冢側梁臺建黔婁自西臺尚書儀曹郎為益州刺史鄧元起表為府長史巴西梓潼二郡太守及成都平城中珍寶山積元起悉分與僚佐唯黔婁一無所取元起惡其異衆厲聲曰長史何獨為高黔婁示不違之請書數篋尋除蜀郡太守在職清素百姓便之元起死于蜀

郡部曲皆散黔婁身營殯斂攜持喪柩歸鄉里東宮建
以中軍記室參軍侍皇太子讀甚見知重詔與太子中
庶子殷鈞中書舍人到洽國子博士明山賓遞日為太
子講五經義遷散騎侍郎卒弟於陵

於陵字子介七歲能言玄理及長清警博學有才思齊
隨王子隆為荊州召為主簿使與謝朓宗夬抄撰羣書
子隆代還又以為送故主簿子隆為明帝所害僚吏畏
避莫至唯於陵與夬獨留經理喪事永元末除東陽遂

安令為人吏所稱梁天監初為建康獄平遷尚書功論
郎待詔文德殿後兼中書通事舍人拜太子洗馬舊東
宮官屬通為清選洗馬掌文翰尤其清者近代用人皆
取中族有才望者時於陵與周捨並擢充此職武帝曰
官以人清豈限中族時論以為美累遷中書黃門侍郎
舍人如故後終於鴻臚卿弟肩吾

肩吾字慎之八歲能賦詩為兄於陵所友愛初為晉安
王國常侍王每徙鎮肩吾常隨府在雍州被命與劉孝

威江伯搖孔敬通申子悅徐防徐搞王囿孔鑠鮑至等
十人抄撰衆籍豐其果饌號高齋學士王為皇太子兼
東宮通事舍人後為安西湘東王中錄事諮議參軍太
子率更令中庶子簡文開文德省置學士肩吾子信徐
搞子陵吳郡張長公北地傅弘東海鮑至等充其選齊
永明中王融謝朓沈約文章始用四聲以為新變至是
轉拘聲韻彌為麗靡復踰往時簡文與湘東王書論之
曰比見京師文體懦鈍殊常競學浮疎爭事闊緩既殊

比興正背風騷若夫六典三禮所施則有地吉凶嘉賓
用之則有所未聞吟詠情性反擬內則之篇操筆寫志
更模酒誥之作遲遲春日翻學歸藏湛湛江水遂同大
傳吾既拙於為文不敢輕有倚撫但以當世之作歷萬
古之才人遠則揚馬曹王近則潘陸顏謝觀其遺辭用
心了不相似若以今文為是則昔賢為非若以昔賢可
稱則今體宜棄俱為盍各則未之敢許又時有劾謝康
樂裴鴻臚文者亦頗有惑焉何者謝客吐言天拔出於

自然時有不拘是其糟粕裴氏乃是良史之才了無篇什之美是為學謝則不屆其精華但得其冗長師裴則蔑絕其所長唯得其所短謝故巧不可階裴亦質不宜慕故胸馳臆斷之侶好名忘實之類決羽謝生豈三千之可及伏膺裴氏懼兩唐之不傳故玉徽金鉞反為拙目所嗤已人下俚更合郢中之聽陽春高而不和妙聲絕而不尋竟不精討錙銖覆量文質有異巧心終愧妍耳是以握瑜懷玉之士瞻鄭邦而知退章甫翠履之人

望閭鄉而歎息詩既若此筆又如之徒以煙墨不言受其驅染紙札無情任其搖襞甚矣哉文章橫流一至於此至如近世謝朓沈約之詩任昉陸倕之筆斯文章之冠冤述作之楷模張士簡之賦周升逸之辯亦成佳手難可復遇文章未墜必有英絕領袖之者非弟而誰每欲論之無可與語思言子建一共商榷辯茲清濁使如涇渭論茲月旦類彼汝南朱白既定雌黃有別使夫懷鼠知慙濫竽自恥相思不見我勞如何及簡文即位以

肩吾為度支尚書時上流蕃鎮並據州拒侯景景矯詔遣肩吾使江州喻當陽公大心大心乃降賊肩吾因逃入東後賊宋子仙破會稽購得肩吾欲殺之先謂曰吾聞汝能作詩今可即作若能將貸汝命肩吾操筆便成辭采甚美子仙乃釋以為建昌令仍間道奔江陵歷江州刺史領義陽太守封武康縣侯卒贈散騎常侍中書令子信

劉虬字靈預一字德明南陽涅陽人晉豫州刺史喬七

世孫也徙居江陵虬少而抗節好學須得祿便隱宋泰始中仕至晉平王驃騎記室當陽令罷官歸家靜處常服鹿皮袷斷穀餌未及胡麻齊建元初豫章王疑為荊州教辟虬為別駕與同郡宗測新野庾易竝遺書禮請之虬等各修牋荅而不應命永明三年刺史廬陵王子卿表虬及同郡宗測宗尚之庾易劉昭五人請加蒲車束帛之命詔徵為通直郎不就竟陵王致書通意虬荅曰虬四節卧疾病三時營灌植暢餘陰於山澤託暮情

於魚鳥寧非唐虞重恩周召宏施虬精信釋氏衣麤布
禮佛長齋注法華經自講佛義以江陵西沙洲去人遠
乃徙居之建武二年詔徵國子博士不就其冬虬病正
晝有白雲徘徊簷戶之內又有香氣及磬聲其日卒年
五十八虬子之遴

之遴字思貞八歲能屬文虬曰此兒必以文興吾宗常
謂諸子曰若比之顏氏之遴得吾之文由是州里稱之
時有沙門僧惠有異識每詣虬必呼之遴小字曰僧伽

福德兒握手而進之年十五舉茂才明經對策沈約任
昉見而異之吏部尚書王瞻嘗候任昉遇之遊在坐昉
謂瞻曰此南陽劉之遴學優未仕水鏡所宜甄擢即調
為太學博士昉曰為之美談不如面試時張稷新除尚
書僕射託昉為讓表昉令之遴代作操筆立成昉曰荆
南秀氣果有異才後位必當過僕御史中丞樂藹即之
遴之舅憲臺奏彈皆令之遴草焉後為荊州中從事梁
簡文臨荊州仍遷宣惠記室之遴篤學明審博覽羣籍

時劉顯韋稜竝稱強記之遴每與討論或不過也累遷中書侍郎後除南郡太守武帝謂曰卿母年德並高故令卿衣錦還鄉盡榮養之理轉西中郎湘東王繹長史太守如故初之遴在荆府常寄居南郡忽夢前太守袁彖謂曰卿後當為折臂太守即居此中之遴後牛奔墮車折臂右手偏直不復得屈伸書則以手就筆歎曰豈黥而王乎周捨嘗戲之曰雖復並坐可橫政恐陋巷無枕後連相兩王再為此郡歷祕書監出為郢州行事之

遜意不願出固辭曰去歲命絕離異不敢東下今年所
忌人在西方武帝手敕曰朕聞妻子具孝衰於親爵祿
具忠衰於君卿既內足理忘奉公之節遂為有司奏免
後為都官尚書太常卿之遜好古愛奇在荊州聚古器
數十百種有一器似甌可容一斛上有金錯字時人無
能知者又獻古器四種於東宮其第一種鏤銅鳴夷榼
二枚兩耳有銀鏤銘云建平二年造其第二種金銀錯
鏤古罇二枚有篆銘云秦容成侯適楚之歲造其第三

種外國澡灌一口有銘云元封二年龜茲國獻其第四
種古製澡盤一枚銘云初平二年造時鄱陽嗣王範得
班固所撰漢書真本獻東宮皇太子令之遶與張纘到
溉陸襄等參校異同之遶錄其異狀數十事其大畧云
案古本漢書稱永平十六年五月二十一日己酉郎班
固上而今本無上書年月日子又案古本叙傳號為中
篇今本稱為敘傳又今本敘傳載班彪事行而古本云
彪自有傳又今本紀及表志列傳不相合為次而古本

相合為次總成三十八卷又今本外戚在西域後古本
外戚次帝紀下又今本高五子文三王景十三王孝武
六子宣元六王雜在諸傳表中古本諸王悉次外戚下
在陳項傳上又今本韓彭英盧吳述云信惟餓隸布實
黥徒越亦狗盜芮尹江湖雲起龍驤化為侯王古本述
云淮陰毅毅伏劍周章邦之傑子寔惟彭英仕為侯王
雲起龍驤又古本第三十七卷解音釋義以助雅詁而
今本無此卷也之遴好屬文多學古體與河東裴子野

沛國劉顯恒共討論古籍因為交好時周易尚書禮記
毛詩並有武帝義疏唯左氏傳尚闕之遴乃著春秋大
意十科左氏十科三傳同異十科合三十事上之帝大
悅詔荅曰省所撰春秋義比事論書辭微旨遠編年之
教言闡義繁丘明傳沫泗之風公羊宗西河之學鐸椒
之解不追瑕丘之說無取繼踵胡毋仲舒云盛因循穀
梁千秋最篤張蒼之傳左氏賈誼之襲荀卿源本分鑣
指歸殊致詳畧紛然其來舊矣昔在弱年久經研味一

從遺置迄將五紀兼晚秋暑促機事罕暇夜分求衣未
遑披括須待夏景試欲推尋若溫故可求別酬所問也
始武帝於齊代為荆府諮議時之遘父虬隱在百里洲
早相知聞帝偶匱乏遣就虬換穀百斛之遘時在父側
曰蕭諮議躋士云何能得春願與其米虬從之及帝即位
常懷之侯景初以蕭正德為帝之遘時落景所將使
授璽紱之遘預知仍剃髮披法服乃免先是平昌伏挺
出家之遘為詩嘲之曰傳聞伏不關化為支道林及之

遘遇亂遂披染服時人笑之尋避難還鄉湘東王繹嘗
嫉其才學聞其西上至夏口乃密送藥殺之不欲使人
知乃自製誌銘厚其賻贈前後文集五十卷子三達字
三善數歲能清言及屬文州將湘東王繹聞之盛集賓
客召而試之說義屬詩皆有理致年十二聽江陵令賀
草講禮還仍覆述不遺一句年十八卒之遘深懷悼恨
乃題墓曰梁妙士以旌之之遘弟之亨

之亨字嘉會年四歲出後叔父嵩及長好學美風姿善

占對武帝之臨荊州唯與虬談虬見之遴之亨帝曰之
遴必以文章顯之亨當以功名著後州舉秀才除太學
博士仍代兄之遴為中書通事舍人累遷步兵校尉湘
東王繹諮議參軍敕賜金策并賜詩焉大通六年出師
南鄭詔湘東王節度諸軍之亨以司農卿為行臺承制
途出本州北界總督衆軍杖節而西樓船戈甲甚盛老
小緣岸觀曰是前舉秀才者鄉部偉之是行也大致剋
復軍士有功皆錄唯之亨為蘭欽所訟執政因而陷之

故封賞不行但復本位而已久之帝讀陳湯傳恨其立功絕域而為文吏所抵宦者張僧胤曰外聞論者竊謂劉之亨似之帝感悟乃封為臨江子固辭不拜之亨美績嘉聲在朱异之右既不協懼為所害故美出之以代之遴為安西湘東王繹長史南郡太守上問朱异曰之亨代兄喜不兄弟因循豈直大馮小馮而已又謂尚書令何敬容曰荊州長史南郡太守皆是僕射出入今者之亨便是九轉在郡有異績吏人稱之卒荆土懷之不

復稱名號為大南郡小南郡子廣德亦好學負才任氣
承聖中位湘東太守魏平荊州依于王綝綝平陳太建
中歷河東太守卒官之亨弟之遲位荊州中從事史子
仲威少有志氣頗涉文史梁承聖中為中書侍郎蕭莊
稱尊號以為御史中丞隨莊終鄴中

坦字德度虬從弟也仕齊歷孱陵令南中郎錄事參軍
所居以幹濟稱梁武帝起兵時輔國將軍楊公則為湘
州刺史帥師赴夏口西朝議行州事者坦求行乃除輔

國長史長沙太守行湘州刺史坦嘗在湘州多舊恩道
迎者甚衆齊東昏遣安成太守劉希祖破西臺所選太
守范僧簡於平都希祖移檄湘部於是始興內史王僧
粲應之湘部諸郡悉皆蜂起州人咸欲汎舟逃走坦悉
聚船焚之前湘州鎮軍鍾玄紹潛應僧粲坦聞其謀偽
為不知因理訟至夜城門遂不閉以疑之玄紹未及發
明旦詣坦問其故久留與語密遣親兵收其家玄紹在
坐未起而收兵已報具得其文書本末玄紹即首伏於

坐斬之焚其文書餘黨悉無所問梁天監初論功封荔
浦子三年遷西中郎長史蜀郡太守行益州事未至蜀
道卒

論曰劉瓛弟兄僧紹父子並業盛專門飾以儒行持身
之節異夫苟得患失者焉庾易劉虬取高一代其所以
行已事兼隱德諸子學業之美各著家聲顯及之遯見
嫉時主或以非罪而斥或以非疾而亡異夫自古哲王
屈已下賢之道有以知武皇之不弘元后之多忌梁祚

之不永也不亦宜哉

南史卷五十

南史卷五十考證

劉瓛弟璉傳與友孔徹同舟入東○與監本訛興今改正

劉顯傳陸倕聞之擊席喜曰劉郎子可謂差人○梁書聞之下無擊席二字郎字下無子字又喜作歎今各本俱同从之

明僧紹傳隱長廣郡嶗山○嶗一本作勞顧炎武日知錄本草天麻生太山嶗山諸山則字本作勞若魏書

地形志唐書姜撫傳宋史甄棲真傳作勞並傳寫之訛乃齊乘以為登之者勞又云一作牢邱長春又改為鰲皆鄙淺可笑今从監本

勃海封延伯者高行士也○延監本誤追从閣本

明山賓傳平仲古稱奇夷齊昔擅美○齊梁書作吾誤庾易傳易謂使人曰走藁採麋鹿之伍終其解之毛衣

○終其解之毛衣一本作終歲鮮毛之衣

庾於陵傳遷尚書功論郎○功論梁書作工部

庾肩吾傳朱白既定雌黃有別○白梁書作丹

劉之遴傳必呼之遴小字曰僧伽福德兒○監本脫伽

字今增正

劉之亨傳故美出之以代之遴為安西湘東王繹長史

○上文云之亨美績嘉聲在朱异之右既不協懼為
所害則美字當係异字之誤也今各本俱同姑仍之

南史卷五十考證

欽定四庫全書

南史卷五十一

唐

李

延

壽

撰

列傳第四十一

梁宗室上

吳平侯景

子勵弟昌

勤昂

勔昱

勃

長沙宣武王懿

子業猷

子韶

孫孝儼駿

猷弟朗

業弟藻猷

永陽昭王敷

衡陽宣王暢

桂陽簡王融

子象

象子慥

臨川靜惠王宏

子正仁

正義弟正德

正德子見理

正德弟正則

正則弟正立

正立子貞

正立弟正表

正表弟正信

吳平侯景字子照梁武帝從父弟也祖道賜以禮讓稱

居鄉有爭訟專賴平之又周其疾急鄉里號曰墟王皆

竊言曰其後必大仕宋終于書侍御史齊末追贈左光

祿大夫三子長曰尚之次曰文帝次曰崇之尚之敦厚

有器業為司徒建安王中兵參軍一府稱為長者遷步

兵校尉卒官梁天監初追謚曰文宣侯子靈鈞仕齊為
廣德令武帝起兵行會稽郡事頃之卒追封東昌縣侯
子謩嗣崇之仕齊官至東陽太守以幹能顯政尚嚴厲
永明中錢唐唐瑀之反別衆破東陽崇之遇害天監初
追謚忠簡侯景崇之子也八歲隨父在郡居喪以毀聞
及長好學才辯有識斷仕齊為永寧令政為百城最永
嘉太守范述曾居郡號稱廉平雅服景為政乃榜郡門
曰諸縣有疑滯者可就永寧令決以疾去官永嘉人胡

仲宣等千人詣闕表請景為郡不許永元二年以長沙
宣武王懿勲除步兵校尉是冬懿遇害景亦逃難武帝
起兵以景行南兖州事時天下未定河北僭楚各據塢
壁景示以威信渠帥相率面縛請罪旬日境內皆平武
帝踐阼封吳平縣侯南兖州刺史加都督詔景母毛氏
為國太夫人禮如王國太妃假金章紫綬景居州清恪
有威裁明解吏職文案無壅下不敢欺吏人畏敬如神
會年荒計口振恤又為餽粥於路以賦之死者給棺具

人甚賴焉天監七年為左驍騎將軍兼領軍將軍領軍
管天下兵要宋孝建以來制局用事與領軍分權典事
以上皆得呈奏領軍垂拱而已及景在職峻切官曹肅
然制局監皆近倖頗不堪命以是不得久留中尋出為
寧蠻校尉雍州刺史加都督八年魏荊州刺史元志攻
潺溝驅迫羣蠻羣蠻悉度漢水來降議者以為蠻累為
邊患可因此除之景曰窮來歸我誅之不祥且魏人來
侵每為矛盾若悉誅蠻則魏軍無礙非長策也乃開樊

城受降因命司馬朱思遠寧蠻長史曹義宗中兵參軍
孟惠雋擊志於潺溝大破之景初到州省除參迎羽儀
器服不得煩擾吏人修葺城壘申警邊備理辭訟勸農
桑郡縣皆改節自勵州內清靜抄盜絕迹十三年復為
領軍將軍直殿省知十州損益事月加祿五萬景為人
雅有風力長於辭令其在朝廷為衆所瞻仰於武帝雖
屬為從弟而禮寄甚隆軍國大事皆與議決十五年加
侍中及太尉揚州刺史臨川王宏坐法免詔景以為安

右將軍監揚州置佐史即宅為府景越親居揚州固讓
至於涕泣帝弗許在州尤稱明斷符教嚴整有田舍老
姥訴得符還至縣縣吏未即發姥語曰蕭監州符如火
汝手何敢留之其為人所畏敬如此遷都督郢州刺史
將發帝幸建興苑餞別為之流涕在州復有能名齊安
竟陵郡接魏界多盜賊景移書告示魏即禁塢戍保境
不復侵略卒于州贈開府儀同三司諡曰忠子勵

勵字文約弱不好弄喜愠不形於色仕太子洗馬母憂

去職殆不勝喪每一思至必徒步之墓或遇風雨仆卧
中路坐地號慟起而復前家人不能禁景特所鍾愛曰
吾百年後其無此子乎使左右節哭服闋除太子中舍
人景薨于郢鎮或以路遠祕其凶問以疾漸為辭勵乃
奔波屈于江夏不進水漿者七日廬于墓所親友隔絕
會叔父曇下詔獄勵乃率昆弟羣從同詣大理雖門生
故吏莫能識之後襲封吳平侯對揚王人悲慟嗚咽傍
人亦為隕涕除淮南太守以善政稱遷宣城内史郡多

猛獸常為人患及勵在任獸暴為息又遷豫章內史道
不拾遺男女異路徙廣州刺史去郡之日吏人悲泣數
百里中舟乘填塞各齎糧食以送勵勵人為納受隨以
錢帛與之至新淦縣所山村有一老姥以槃檠鮓魚自
送舟側奉上之童兒數十人入水扳舟或歌或泣廣州
邊海舊饒外國舶至多為刺史所侵每年舶至不過三
數及勵至纖毫不犯歲十餘至俚人不賓多為海暴勵
征討所獲生口寶物軍資之外悉送還臺前後刺史皆

營私蓄方物之貢少登天府自勵在州歲中數獻軍國
所須相繼不絕武帝歎曰朝廷便是更有廣州有詔以
本號還朝而江西俚帥陳文徹出寇高要又詔勵重申
蕃任未幾文徹降附勵以南江危險宜立重鎮乃表臺
於高涼郡立州敕仍以為高州以西江督護孫固為刺
史徵為太子左衛率勵性率儉而器度寬裕左右嘗將
羹至胷前翻之顏色不異徐呼更衣聚書至三萬卷披
翫不倦尤好東觀漢記略皆誦憶劉顯執卷策勵酬應

如流乃至卷次行數亦不差失少交結唯與河東裴子
野范陽張纘善卒於道贈侍中諡曰光侯勵弟勸勸字
文肅少以清靜自立封西鄉侯位南康內史太舟卿大
寶元年與南康王會理謀誅侯景事發遇害勸弟勸
字文祗封東鄉侯位太子洗馬及勸同見害勸弟勃位
定州刺史封曲江鄉侯大寶初廣州刺史元景仲將謀
應侯景西江督護陳霸先攻景仲迎勃為刺史時湘東
王繹在荊州雖承制授職力不能制遂從之勃乃鎮嶺

南為廣州刺史後江表定以王琳代為廣州以勃為晉
州刺史魏剋江陵勃復據廣州敬帝承制加司徒紹泰
中為太尉尋進為太保及陳武禪代之際舉兵不從尋
敗遇害

昌字子建景弟也位衡州刺史性好酒在州每醉徑出
人家或獨詣草野刑戮頗無期度醉時所殺醒或求焉
亦無悔也累遷兼宗正卿屢為有司所劾久留都忽忽
不樂遂縱酒虛憊在石頭東齋引刀自刺而卒弟昂

昂字子明位輕車將軍監南充州初兄景再為兗州德惠在人及昂來代時人方之馮氏徵為琅邪彭城二郡太守時有女子年二十許散髮黃衣在武窟山石室中無所修行唯不甚食或出人間時飲少酒鵝卵一兩枚人呼為聖姑就求子往往有效造者充滿山谷昂呼問無所對以為祆惑鞭之二十創即差失所在中大通元年為領軍將軍久之封湘陰侯出為江州刺史卒諡曰恭侯

昂弟昱字子真少而狂狷不拘禮度異服危冠交遊冗
雜尤善屠牛業以為常於宅內酤酒好騎射歷位中書
侍郎每求試邊州武帝以其輕脫無威望抑而不許遷
給事黃門侍郎上表請自解帝手詔責之坐免官因此
杜門絕朝覲普通五年坐於宅內鑄錢為有司所奏下
廷尉得免死徙臨海郡行至上虞有敕追還令受菩薩
戒既至恂恂盡禮改意蹈道持戒又精潔帝甚嘉之為
晉陵太守下車勵名迹除煩苛明法憲嚴於姦吏旬日

之間郡中大安俄而暴卒百姓行號巷哭市里為之誼
沸設祭奠於郡庭者四百餘人田舍有婦女夏氏年百
餘歲扶曾孫出郡悲泣不自勝其惠化所感如此百姓
相率為立廟建碑以紀其德又詣都表求贈諡詔贈湘
州刺史諡曰恭子

文帝十男張皇后生長沙宣武王懿永陽昭王敷武帝
衡陽宣王暢李太妃生桂陽簡王融融為東昏所害敷
暢齊建武中卒武帝踐阼並追封郡王陳太妃生臨川

靜惠王宏南平元襄王偉吳太妃生安成康王秀始興忠武王懔費太妃生鄱陽忠烈王恢

長沙宣武王懿字元達文帝長子也少有令譽解褐齊安南邵陵王行參軍襲爵臨湘縣侯歷位晉陵太守以善政稱永明末為梁南秦二州刺史加督是歲魏軍入漢中遂圍南鄭懿隨機拒擊乃解圍遁去又遣氏帥楊元秀攻取魏歷城等六戍魏人震懼邊境遂寧永元二年裴叔業據豫州反懿以豫州刺史領歷陽南譙二郡

太守討之叔業懼遂降魏武帝時在雍州遣典籤趙景
悅說懿興晉陽之甲誅君側之罪懿不荅既而平西將
軍崔慧景入寇奉江夏王寶玄圍臺城齊室大亂馳信
召懿懿時方食投箸而起率銳卒三千人入援武帝馳
遣虞安福下都說懿曰誅賊之後則有不賞之功當明
君賢主尚或難立況於亂朝何以自免若賊滅之後仍
勒兵入宮行伊霍故事此萬世一時若不欲爾便放表
還歷陽託以外拒為事則威振內外誰敢不從一朝放

兵受其厚爵高而無人必生後悔長史徐曜甫亦苦勸並不從慧景遣其子覺來拒懿擊大破之乘勝而進慧景衆潰追斬之授中書令都督征討水陸諸軍事時東昏肆虐茹法珍王咺之等執政宿臣舊將並見誅夷懿既勲高獨居朝右深為法珍等所憚乃說東昏將加酷害徐曜甫知之密具舟江渚勸令西奔懿不從曰古皆有死豈有叛走中書令邪尋見留省賜藥與弟融俱殞謂使者曰家弟在雍深為朝廷憂之中興元年贈司徒

宣德太后臨朝改贈太傅天監元年追崇丞相封長沙郡王諡曰宣武給九旒鸞輅黃屋左纛葬禮依晉安平王故事懿名望功業素重武帝本所崇敬帝以天監元年四月丙寅即位是日即見褒崇戊辰乃崇贈第二兄敷第四弟暢第五弟融至五月有司方奏追皇考皇妣尊號遷神主于太廟帝不親奉命臨川王宏侍從七月帝臨軒遣兼太尉散騎常侍王份奉策上太祖文皇帝獻皇后及德皇后尊號既先卑後尊又臨軒命策識者

頗致譏議焉

懿子業字靜曠幼而明敏仕齊為太子舍人宣武之難
與二弟藻象俱逃匿於王嚴秀家東昏知之收嚴秀付
建康獄考掠備極乃以鉗拔手爪至死不言竟以免禍
天監二年襲封長沙王歷位祕書監侍中都督南兗州
刺史運私邸米餽人作甓以砌城武帝善之徙湘州尤
著善政零陵舊有二猛獸為暴無故相枕而死郡人唐
睿見猛獸傍一人曰刺史德感神明所以兩猛獸自甓

言訖不見衆並異之業性敦篤所在留意普通四年為侍中金紫光祿大夫薨諡曰元王文集行於世子孝儼嗣

孝儼字希莊射策甲科除祕書郎太子舍人從幸華林園於坐獻相風烏華光殿景陽山等頌其文甚美帝深賞異之薨諡曰章子春嗣業弟藻

藻字靖藝仕齊位著作佐郎天監元年封西昌縣侯為益州刺史時鄧元起在蜀自以有尅劉季連功恃宿將

輕少藻藻怒乃殺之既天下草創邊徼未安州人焦僧
護聚衆數萬據郾繁作亂藻年未弱冠集僚佐議欲自
擊之或陳不可藻大怒斬之階側乃乘平肩輿巡行賊
壘賊聚弓亂射矢下如雨從者舉楯禦箭又命除之由
此人心大安賊乃夜遁藻命騎追擊平之元年徵為太
子中庶子初鄧元起之在蜀也崇於聚斂財貨山積金
玉珍帛為一室名曰內藏綺縠錦罽為一室號曰外府
藻以外府賜將帥內藏歸王府不有私焉及是還朝輕

裝就路再遷侍中藻性謙退不求聞達善屬文尤好古
體自非公宴未嘗妄有所為縱有小文成輒棄本歷雍
兗二州刺史頻蒞州鎮人吏咸稱之推善下人常如弗
及普通六年為軍師將軍與西豐侯正德北侵渦陽輒
班師為有司奏免官削爵土八年復封爵中大通三年
為中軍將軍太子詹事出為丹陽尹帝每稱其小字歎
曰子弟並如迦葉吾復何憂入為尚書左僕射加侍中
固辭不許大同五年遷中衛將軍開府儀同三司中書

令侍中如故藻性恬靜獨處一室牀有膝痕宗室衣冠
莫不楷則常以爵祿太過每思屏退門庭閑寂賓客罕
通簡文尤敬愛之自遭家禍恒布衣蒲席不食鮮禽非
公庭不聽音樂武帝每以此稱之出為南徐州刺史侯
景亂藻遣世子彧率兵入援及城開加散騎常侍侯景
遣其儀同蕭邕代之據京口藻因感氣疾或勸奔江北
藻曰吾國之台鉉任寄特隆既不能誅翦逆賊正當同
死朝廷耳因不食而薨

藻弟猷封臨汝侯為吳興郡守性倜儻與楚王廟神交
飲至一斛每酹祀盡歡極醉神影亦有酒色所禱必從
後為益州刺史侍中中護軍時江陽人齊苟兒反衆十
萬攻州城猷兵糧俱盡人有異心乃遙禱請救是日有
田老逢一騎浴鐵從東方來問去城幾里曰百四十時
日已晡騎舉稍曰後人來可令之疾馬欲及日破賊俄
有數百騎如風一騎過請飲田老問為誰曰吳興楚王
來救臨汝侯當此時廟中請祈無驗十餘日乃見侍衛

土偶皆泥濕如汗者是月猷大破荀兒猷在州頗僭濫客筵內遂有香橙不置連榻武帝末知之以此為愆還都以憂愧成疾卒諡曰靈以與神交也

猷子韶字德茂初封上甲縣都鄉侯太清初為舍人城陷奉詔西奔及至江陵人士多往尋覓令韶說城內事韶不能人人為說乃疏為一卷客問者便示之湘東王聞而取看謂曰昔王韶之為隆安紀十卷說晉末之亂離今之蕭韶亦可為太清紀十卷矣韶乃更為太清紀

其諸議論多謝吳為之韶既承旨撰著多非實錄湘東王德之改超繼宣武王封長沙王遂至郢州刺史韶昔為幼童庾信愛之有斷袖之歡衣食所資皆信所給遇客韶亦為信傳酒後為郢州信西上江陵途經江夏韶接信甚薄坐青油幕下引信入宴坐信別榻有自矜色信稍不堪因酒酣乃徑上韶牀踐蹋肴饌直視韶而謂曰官今日形容大異近日時賓客滿坐韶甚慙恥

韶弟駿字德款善草隸工文章晚更習武膂力絕人與

永安侯確相類位尚書殿中郎起武將軍封南安侯城陷為賊任約所禮謀召鄱陽嗣王範襲約反為所害

猷弟朗字靖徹天監五年例以王子封侯歷太子洗馬桂州刺史加都督性倨而虐羣下患之記室庾丹以忠諫見害帝聞之使於嶺表以功自効丹父景休位御史中丞丹少有雋才與伏挺何子朗俱為周捨所狎初景休罷巴東郡頗有資產丹負錢數百萬責者填門景休怒不為之償既而朝賢之丹不之景休景休悅乃悉為

還之為建康正坐事流廣州

朗弟明字靖通少被武帝親愛封貞陽侯太清元年為豫州刺史百姓詣闕拜表言其德政樹碑于州門內及碑匠採石出自肥陵明乃廣營廚帳多召人物躬自率領牽至州識者笑之曰王自立碑非州人也武帝既納侯景大舉北侵使南康王會理總兵明乃拜表求行固請乃許之會理已至宿豫詔改以明代為都督水陸諸軍趣彭城大圖進取敕曰侯景志清鄴洛以雪讐恥其

先率大軍隨機撫定汝等衆軍可止於寒山築堰引清水以灌彭城大水一沉孤城自殄慎勿妄動明師次呂梁十八里作寒山堰以灌彭城水及于堞不沒者三板魏遣將慕容紹宗赴救明謀略不出號令莫行諸將每諮事輒怒曰吾自臨機制變勿多言衆乃各掠居人明亦不能制唯禁其一軍無所侵掠紹宗至決堰水明命將救之莫肯出魏軍轉逼人情大駭胡貴孫謂趙伯超曰不戰何待伯超懼不能對貴孫乃入陳苦戰伯超擁

衆弗敢救曰與戰必敗不如全軍早歸乃使具良馬載其愛妾自隨貴孫遂沒伯超子威方將赴戰伯超懼其出使人召之遂相與南還明醉不能興衆軍大敗明見俘執北人懷其不侵掠謂之義王及至魏魏帝引見明及諸將帥釋其禁送晉陽勃海王高澄禮明甚重謂曰先王與梁主和好十有餘年聞彼禮佛文常云奉為魏主并及先王此甚是梁主厚意不謂一朝失信致此紛擾因欲與梁通和使人以明書告武帝方致書以慰高

澄東魏除明散騎常侍及開社稷淪蕩哀泣不捨晝夜
魏平江陵齊文宣使送明至梁并前所獲梁將湛海珍
等皆聽從明歸令上黨王渙率衆送之是時太尉王僧
辯司空陳霸先在建康推晉安王方智為太宰都督中
外諸軍事承制置百官渙軍漸進明與僧辯書求迎僧
辯不從及渙破東關斬裴之橫僧辯懼乃納明於是梁
興東度齊師北反明至望朱雀門便長慟迄至所止道
俗參問皆以哭對之及稱尊號改承聖四年為天成元

年大赦境內以方智為太子授王僧辯大司馬遣其子章馳到齊拜謝齊遇明及僧辯使人在館供給宴會豐厚一同武帝時使及陳霸先襲殺僧辯復奉晉安王是為敬帝而以明為太傅建安王報齊云僧辯陰謀篡逆故誅之仍請稱臣于齊永為蕃國齊遣行臺司馬恭及梁人盟於歷陽明年齊人徵明霸先猶稱蕃將遣使送明疽發背死時王琳與霸先相抗齊文宣遣兵納永嘉王莊主梁祀追諡明曰閔皇帝

永陽昭王敷字仲達文帝第二子也少有學業仕齊為
隨郡內史招懷遠近士庶安之以為前後之政莫及明
帝謂徐孝嗣曰學士舊聞例不解理官聞蕭隨郡唯置
酒清言而路不拾遺行何風化以至於此答曰古者修
文德以來遠人況止郡境而已帝稱善徵為廬陵王諮
議參軍卒武帝即位贈司空封永陽郡王諡曰昭天監
二年子伯游嗣伯游字士仁位會稽太守薨諡曰恭
衡陽宣王暢文帝第四子也有美名仕齊位太常封江

陵縣侯卒天監元年追贈開府儀同三司封衡陽郡王
諡曰宣三年子元簡位郢州刺史卒於官諡曰孝葬將
引柩有聲議者欲開視王妃柳氏曰晉文已有前例不
聞開棺無益亡者之生徒增生者之痛遂止少子獻嗣
桂陽簡王融文帝第五子也仕齊位太子洗馬與宣武
王懿俱遇害天監元年贈撫軍大將軍封桂陽郡王諡
曰簡無子詔以長沙宣武王第九子象嗣

象字世翼容止閑雅簡於交游事所生母以孝聞位丹

陽尹象生長深宮始親庶政舉無失德朝廷稱之再遷
湘州刺史加都督湘州舊多猛獸為暴及象任州日四
猛獸死於郭外自此靜息故老咸稱政德所感歷位太
常卿加侍中兼遷祕書監薨諡曰敦子慥嗣

慥字元貞位信州刺史有威惠太清二年赴援臺城遇
敕還蕃尋為張纘所構書報湘東王曰河東桂陽二蕃
犄角欲襲江陵湘東乃水步兼行至荆鎮慥尚軍江津
不以為意湘東至乃召慥深加慰喻慥心乃安後留止

省內慄心知禍及遂肆醜言湘東大怒付獄殺之

臨川靜惠王宏字宣達文帝第六子也長八尺美鬚眉容止可觀仕齊為北中郎桂陽王功曹史宣武之難兄弟皆被收道人釋惠思藏宏及武帝師下宏至新林奉迎建康平為中護軍領石頭戍事天監元年封臨川郡王位揚州刺史加都督四年武帝詔宏都督諸軍侵魏宏以帝之介弟所領皆器械精新軍容甚盛北人以為百數十年所未之有軍次洛口前軍剋梁城宏部分乖

方多違朝制諸將欲乘勝深入宏聞魏接近畏懦不敢進召諸將欲議旋師呂僧珍曰知難而退不亦善乎宏曰我亦以為然柳惔曰自我大衆所臨何城不服何謂難乎裴邃曰是行也固敵是求何難之避馬仙琕曰王安得亡國之言天子掃境內以屬王有前死一尺無却生一寸昌義之怒鬚盡磔曰呂僧珍可斬也豈有百萬之師輕言可退何面目得見聖主乎朱僧勇胡辛生拔劒而起曰欲退自退下官當前向取死議者已罷僧珍

謝諸將曰殿下昨來風動意不在軍深恐大致沮喪欲使全師而反又私裴邃曰王非止全無經略庸怯過甚吾與言軍事都不相入觀此形勢豈能成功宏不敢便違羣議停軍不前魏人知其不武遺以巾幘北軍歌曰不畏蕭娘與吕姥但畏合肥有韋武武謂韋叡也僧珍歎曰使始興吳平為元帥我相毗輔中原不足平今遂敵人見欺如此乃欲遣裴邃分軍取壽陽大衆停洛口宏固執不聽乃令軍中曰人馬有前行者斬自是軍政

不和人懷憤怒魏奚康生馳遣楊大眼謂元英曰梁人自剋梁城已後久不進軍其勢可見當是懼我王若進據洛水彼自奔敗元英曰蕭臨川雖驍其下有好將韋裴之屬亦未可當望氣者言九月賊退今且觀形勢未可便與交鋒張惠紹次下邳號令嚴明所至獨剋下邳人多有欲來降惠紹曰我若得城諸卿皆是國人若不能破賊徒令公等失鄉非朝廷弔人本意也今且安堵復業勿妄自辛苦降人咸悅九月洛口軍潰宏棄衆走

其夜暴風雨軍驚宏與數騎逃亡諸將求宏不得衆散而歸棄甲投戈填滿水陸捐棄病者強壯僅得脫身宏乘小船濟江夜至白石壘款城門求入臨汝侯登城謂曰百萬之師一朝奔潰國之存亡未可知也恐姦人乘間為變城門不可夜開宏無辭以對乃絕食饋之惠紹聞洛口敗亦退軍六年遷司徒領太子太傅八年為司空揚州刺史十一年正月為太尉其年冬以公事左遷驃騎大將軍開府同三司之儀未拜遷揚州刺史十二

年加司空十五年所生母陳太妃薨去職尋起為中書
監驃騎大將軍揚州刺史如故宏妾弟吳法壽性麤狡
恃宏無所畏忌輒殺人死家訴有敕嚴討法壽在宏府
內無如之何武帝制宏出之即日償辜南司奏免宏司
徒驃騎揚州刺史武帝注曰愛宏者兄弟私親免宏者
王者正法所奏可宏自洛口之敗常懷愧憤都下每有
竊發輒以宏為名屢為有司所奏帝每貫之十七年帝
將幸光宅寺有士伏於驃騎航待帝夜出帝將行心動

乃於朱雀航過事發稱為宏所使帝泣謂宏曰我人才
勝汝百倍當此猶恐顛墜汝何為者我非不能為周公
漢文念汝愚故宏頓首曰無是無是於是罪免而繼
恣不悛奢侈過度修第擬於帝宮後庭數百千人皆極
天下之選所幸江無畏服玩侔於齊東昏潘妃寶牒直
千萬好食鯖魚頭常日進三百其他珍膳盈溢後房食
之不盡棄諸道路江本吳氏女也世有國色親從子女
徧游王侯後宮難免兄弟九人因權勢橫於都下宏未

幾復為司徒普通元年遷太尉揚州刺史侍中如故七年四月薨自疾至薨輿駕七出臨視及薨詔贈侍中太將軍揚州牧假黃鉞并給羽葆鼓吹一部增班劍為六十人謚曰靖惠宏以介弟之貴無佗量能恣意聚斂庫室垂有百間在內堂之後關籥甚嚴有疑是鎧仗者密以聞武帝於友于甚厚殊不悅宏愛妾江氏寢膳不能暫離上佗日送盛饌與江曰當來就汝懽宴唯攜布衣之舊射聲校尉丘佗卿往與宏及江大飲半醉後謂曰

我今欲履行汝後房便呼後閣輿徑往屋所宏恐上見其賄貨顏色怖懼上意彌言是仗屋屋檢視宏性愛錢百萬一聚黃榜標之千萬一庫懸一紫標如此三十餘間帝與佗卿屈指計見錢三億餘萬餘屋貯布絹絲綿漆蜜紵蠟朱沙黃屑雜貨但見滿庫不知多少帝始知非仗大悅謂曰阿六汝生活大可方更劇飲至夜舉燭而還兄弟情方更敦睦宏都下有數十邸出懸錢立券每以田宅邸店懸上文券期訖便驅券主奪其宅都下

東土百姓失業非一帝後知制懸券不得復驅奪自此
後貧庶不復失居業晉時有錢神論豫章王綜以宏貪
吝遂為錢愚論其文甚切帝知以激宏宣旨與綜天下
文章何限那忽作此雖令急毀而流布已遠宏深病之
聚斂稍改宏又與帝女永興主私通因是遂謀弑逆許
事捷以為皇后帝嘗為三日齋諸主並豫永興乃使二
僮衣以婢服僮踰闕失屢閤帥疑之密言於丁貴嬪欲
上言懼或不信乃使宮帥圖之帥令內興人八人纏以

純綿立於幕下齋坐散主果請間帝許之主升階而僮
先趣帝後八人抱而擒之帝驚墜於宸搜僮得刀辭為
宏所使帝祕之殺二僮於內以漆車載主出主恚死帝
竟不臨之帝諸女臨安安吉長城三主並有文才而安
吉最得令稱宏性好內樂酒沉湎聲色侍女千人皆極
綺麗慎衛寡方故屢致降免宏子十人許可者七人
長子正仁字公業位祕書丞早卒諡哀世子正仁弟正
義嗣

正義字公威初以王子封平樂侯位太常卿南徐州刺史屬武帝幸朱方正義修解宇以待興駕初京城之西有別嶺入江高數十丈三面臨水號曰北固蔡謨起樓其上以置軍實是後崩壞頂猶有小亭登降甚狹及上升之下輦步進正義乃廣其路傍施欄楯翌日上幸遂通小輿上悅登望久之敕曰此嶺不足須固守然京口實乃壯觀乃改曰北顧賜正義束帛後為東揚州刺史薨正義弟正德

正德字公和少而凶慝招聚亡命破冢屠牛兼好弋獵
齊建武中武帝崩嗣未立養以為子及平建康生昭明
太子正德還本天監初封西豐縣侯累遷吳郡太守正
德自謂應居儲嫡心常怏怏每形於言普通三年以黃
門侍郎為輕車將軍置佐史頃之奔魏初去之始為詩
一絕內火籠中即詠竹火籠曰楨榦屈曲盡蘭麝氛氲
銷欲知懷炭日正是履氷朝至魏稱是被廢太子時齊
蕭寶夤先在魏乃上表魏帝曰豈有伯為天子父作揚

州棄彼密親遠投他國不若殺之魏既不禮之正德乃殺一小兒稱為已子遠營葬地魏人不疑又自魏逃歸見於文德殿至庭叩頭武帝泣而誨之特復本封正德志行無悛常公行剝掠時東府有正德及樂山侯正則潮溝有董當門子暹世謂之董世子者也南岸有夏侯夔世子洪此四凶者為百姓巨蠹多聚亡命黃昏多殺人於道謂之打稽時勲豪子弟多縱恣以淫盜屠殺為業父祖不能制尉邏莫能禦車服牛馬號西豐駱馬樂

山烏牛董暹金帖織成戰襖直七百萬後正則為劫殺
沙門徙嶺南死洪為其父夔奏繫東治死於徒暹坐與
永陽王妃王氏亂誅三人既除百姓少安正德淫虐不
革尋除給事黃門侍郎六年為輕車將軍隨豫章王北
侵正德輒棄軍委走為有司所奏下獄帝復詔曰汝以
猶子情兼常愛故越先汝兄剖符連郡往年任在蜀昵近
小人猶謂少年情志未定更於吳郡殺戮無辜劫盜財
物雅然無畏及還京師專為逋逃乃至江乘要道湖頭

斷路遂使京邑士女早閉晏開又奪人妻妾略人子女
徐敖非直失其配匹乃橫屍道路王伯敖列卿之女誘
為妾媵我每加掩抑冀汝自新了無悛革怨讐逾甚遂
匹馬奔亡志懷反噬遣信慰問冀汝能還果能來歸遂
我夙志謂汝不好文史志在武功令汝杖節董戎前驅
豈謂汝狼心不改包藏禍胎志欲覆敗國計以快汝心
今當宥汝以遠無令房累自隨敕所在給汝廩餼王新
婦見理等當停太尉間汝餘房累悉許同行於是免官

削爵土徙臨海郡未至徙所道追赦之八年復封爵正德北還求交朱异帝既封昭明諸子异言正德失職大通四年特封臨賀郡王後為丹陽尹坐所部多劫盜復為有司所奏去職出為南兗州在任苛刻人不堪命廣陵沃壤遂為之荒至人相食噉既累試無能從是黜廢轉增憤恨乃陰養死士常思國讐聚蓄米粟宅內五十間室並以為倉自征虜亭至于方山悉略為墅蓄奴僮數百皆黥其面太清二年秋侯景反知其有姦心景黨

徐思玉在北經與正德相知至是景遣思玉至建業具
以事告又與正德書曰今天子年尊姦臣亂國以景觀
之計日必敗大王屬當儲貳中被廢辱天下義士竊所
忿慨大王豈得顧此私情棄茲億兆景雖不武實思自
奮正德得書大喜曰侯景之意暗與人同天贊我也遂
許之及景至正德潛運空舫詐稱迎荻以濟景焉朝廷
未知其謀以正德為平北將軍屯朱雀航景至正德乃
北向望闕三拜跪辭歔欷流涕引賊入宣陽門與景交

揖馬上退據左衛府先是其軍並著絳袍袍裏皆碧至是悉反之賊以正德為天子號曰正平元年初童謠有之故以應也又世人相假必稱正平耳正德乃以長子見理為太子以女妻景景為丞相與約曰平城之日不得全二宮又令畿內王侯三日不出者誅之及臺城開正德率衆揮刀欲入賊先使其徒守門故正德不果乃復太清之號降正德為侍中大司馬正德入問訊拜且泣武帝曰愜其泣矣何嗟及矣正德知為賊所賣深自

咎悔密書與鄱陽嗣王契以兵入賊遮得書乃矯詔殺之先是正德妹長樂主適陳郡謝禧正德姦之燒主第縛一婢加玉釧於手以金寶附身聲云主被燒死檢取婢屍并金玉葬之仍與主通呼為柳夫人生一子焉日月稍久風聲漸露後黃門郎張準有一雉媒正德見而奪之尋會重雲殿為淨供皇儲以下莫不畢集準於衆中叱罵曰張準雉媒非長樂主何可略奪皇太子恐帝聞之令武陵王和止之乃休及出送雉媒還之其後梁

室傾覆既由正德百姓至聞臨賀郡名亦不欲道童謠云寧逢五虎入市不欲見臨賀父子其惡之如是

見理字孟節性甚凶麤長劒短衣出入廬里不為宗室所齒及肆逆甚得志焉招聚羣盜每夜輒掠劫於大航為流矢所中死正德弟正則

正則字公衡天監初以王子封樂山侯累遷太子洗馬舍人恒於第內私械百姓令養馬又盜鑄錢大通二年坐匿劫盜削爵徙鬱林帝敕廣州日給酒肉南中官司


猶處以侯禮正則滋怨諸父與西江督護靳山顧通室招誘亡命將襲番禺未及期而事發遂鳴鼓會將攻州城刺史元景仲命長史元孝深討之正則敗逃于厠村人縛送之詔斬於南海有司請絕屬籍收妻子詔聽絕屬籍妻子特原正則弟正立

正立字公山初封羅平侯母江有寵初正仁之亡宏溺情曲制以正立為世子正立微有學宏薨後知非朝議表求讓兄帝甚嘉焉諸侯例封五百戶正立改封實土

建安縣侯食邑一千戶後位丹陽尹薨諡曰敏子賁嗣
賁字世文性躁薄正德為侯景所立賁出投之專監造
攻具以攻臺城常為賊耳目南康嗣王會理謀襲景賁
與中宿世子子邕告之賊矯封賁竟陵王子邕隨郡王
並改姓侯氏賁為宗正卿子邕都官尚書專權陵蔑朝
政居嘗晝卧見柳敬禮蕭勸入室毆之賁驚起乞恩俄
而賊惡其翻覆殺之

正立弟正表封封山侯後奔樂山表弟正信

正信字公理封武化侯與正立同生亦被宏鍾愛然幼
不慧常執白團扇湘東王取題八字銘玩之正信不知
嗤之終常搖握位給事中卒



南史卷五十一

南史卷五十一考證

吳平侯景傳梁武帝從父弟也○從父弟監本誤從弟
父今从梁書改正

長沙宣武王懿子猷傳為吳興郡守性倜儻與楚王廟
神交飲至一斗○下文遙禱請救大破齊苟兒與南
齊書蕭惠休事神謹故得美遷畧同

猷子韶傳湘東王德之改超繼宣武王封長沙王○超
疑係韶字之訛但各本俱同始仍之

桂陽簡王融子象傳位丹陽尹○位監本訛於今改正
臨川靜惠王宏傳豈有百萬之師輕言可退○輕監本

作卿今从閣本

親從子女徧游王侯後宮難免兄弟九人因權勢橫於
都下○難一本作男又注云一作難然俱不可解

南史卷五十一考證